

აღმოსავლეთ ევროპის უნივერსიტეტი

ეთიკური დარღვევების შეტყობინებისა და შურისძიებისგან დაცვის პოლიტიკა

მუხლი 1. პოლიტიკის მიზანი და მოქმედების სფერო

- წინამდებარე პოლიტიკის მიზანია აღმოსავლეთ ევროპის უნივერსიტეტში ეთიკური მმართველობის, კეთილსინდისიერების, გამჭვირვალობისა და ანგარიშვალდებულების გაძლიერება ეთიკური დარღვევების შესახებ უსაფრთხო და სანდო შეტყობინების მექანიზმის შექმნის გზით.
- პოლიტიკა ადგენს ეთიკური დარღვევების შეტყობინების, კონფიდენციალურობის დაცვისა და შურისძიებისგან დაცვის პრინციპებს.
- პოლიტიკა ვრცელდება უნივერსიტეტის სტუდენტებზე, აკადემიურ და ადმინისტრაციულ პერსონალზე, ასევე ნებისმიერ პირზე, რომელსაც გააჩნია ინფორმაცია უნივერსიტეტის ფარგლებში შესაძლო ეთიკური დარღვევის შესახებ.
- პოლიტიკა არ ვრცელდება კვლევის ეთიკასთან დაკავშირებულ საკითხებზე, რომლებიც რეგულირდება უნივერსიტეტის კვლევის ეთიკის ცალკე მექანიზმებით.

მუხლი 2. ეთიკური დარღვევის ცნება და მაგალითები

ეთიკურ დარღვევად შეიძლება ჩაითვალოს, მათ შორის, მაგრამ არ შემოიფარგლება:

- ეთიკური ქცევის წესების დარღვევა;
- ინტერესთა კონფლიქტის დაუფიქსირებლობა ან არაკეთილსინდისიერი მართვა;
- დისკრიმინაცია ნებისმიერი ნიშნით;
- შევიწროება ან არაეთიკური მოპყრობა;
- ადმინისტრაციული ან ინსტიტუციური ეთიკის დარღვევა;
- სხვა ქმედება ან უმოქმედობა, რომელიც ეწინააღმდეგება უნივერსიტეტის ეთიკურ პრინციპებსა და შიდა პოლიტიკებს.

მუხლი 3. შეტყობინების უფლება და კეთილსინდისიერება

- ნებისმიერ პირს უფლება აქვს კეთილსინდისიერად შეატყობინოს ეთიკის კომიტეტს შესაძლო ეთიკური დარღვევის შესახებ.
- შეტყობინება ითვლება კეთილსინდისიერად გაკეთებულად, თუ იგი ეფუძნება განმცხადებლის რეალურ რწმენას და არსებულ ინფორმაციას, მიუხედავად იმისა, დადასტურდება თუ არა შემდგომში დარღვევა.
- პოლიტიკა არ იცავს შეგნებულად ცრუ ან ბოროტად გაკეთებულ შეტყობინებებს.

მუხლი 4. შეტყობინების წარდგენის არხები

1. ეთიკური დარღვევის შესახებ შეტყობინება შესაძლებელია წარდგენილ იქნეს:
 - ა) ეთიკის კომიტეტის ელექტრონული ფოსტის მეშვეობით;
 - ბ) უნივერსიტეტის ოფიციალურ ვებგვერდზე განთავსებული ონლაინ ფორმის საშუალებით.
2. შეტყობინება შეიძლება იყოს როგორც სახელობითი, ისე ანონიმური.

მუხლი 5. კონფიდენციალურობა

1. ეთიკის კომიტეტი უზრუნველყოფს ყველა შეტყობინების კონფიდენციალურ განხილვას.
2. განმცხადებლის ვინაობა და მასთან დაკავშირებული პერსონალური მონაცემები არ ექვემდებარება გამჟღავნებას, გარდა კანონით პირდაპირ გათვალისწინებული შემთხვევებისა.
3. ინფორმაცია გამოიყენება მხოლოდ განცხადების განხილვისა და შესაბამისი რეაგირების მიზნით.

მუხლი 6. შურისძიებისგან დაცვის პრინციპი

1. აკრძალულია ნებისმიერი ფორმის შურისძიება იმ პირის მიმართ, რომელმაც კეთილსინდისიერად შეატყობინა ეთიკის კომიტეტს შესაძლო ეთიკური დარღვევის შესახებ ან ითანამშრომლა განხილვის პროცესში.
2. შურისძიება მოიცავს, მათ შორის:
 - ა) დისციპლინურ ზეწოლას;
 - ბ) სამუშაო ან სასწავლო პირობების გაუარესებას;
 - გ) მუქარას, დაშინებას ან დისკრიმინაციულ მოპყრობას.
3. შურისძიება წარმოადგენს ეთიკურ დარღვევას და იწვევს შესაბამის დისციპლინურ პასუხისმგებლობას.

მუხლი 7. შეტყობინების განხილვის ზოგადი პროცედურა

1. ეთიკის კომიტეტი აფასებს შეტყობინებას თავისი კომპეტენციის ფარგლებში.
2. საჭიროების შემთხვევაში კომიტეტი ითხოვს დამატებით ინფორმაციას.
3. განხილვა ხორციელდება მიუკერძოებლად, კოლეგიურად და ეთიკური სტანდარტების დაცვით.
4. განხილვის შედეგად ეთიკის კომიტეტი გასცემს დასკვნას ან რეკომენდაციას უნივერსიტეტის შესაბამისი ორგანოებისთვის.

მუხლი 8. განათლება და პრევენცია

უნივერსიტეტი ხელს უწყობს ეთიკური დარღვევების პრევენციას:

- ა) ეთიკის პოლიტიკებისა და პროცედურების ხელმისაწვდომობის უზრუნველყოფით;

- ბ) ცნობიერების ამაღლების ღონისძიებებით სტუდენტებისა და პერსონალისთვის;
- გ) ეთიკური კულტურის მხარდაჭერით.

მუხლი 9. დასკვნითი დებულებები

1. წინამდებარე პოლიტიკა დამტკიცებულია უნივერსიტეტის წარმომადგენლობითი საბჭოს მიერ.
2. პოლიტიკა ძალაში შედის დამტკიცების დღიდან.
3. პოლიტიკა საჯაროდ ხელმისაწვდომია უნივერსიტეტის ოფიციალურ ვებგვერდზე.